

Sefera Hindistanê - 3

Min çavên xwe girtin û ramîyam. Xwezî cûdahî û çîneyetî tineba. Her kes bikarîya li her derê rûništa û rêwîtiyê bikira. Wisa jî min xwezîya xwe bi trênen Hindistanê anî, ku heta dev tije ne û heta ser banên wan jî. Qeza çêdibin, lê xem nake! Qenebe cûdayî tineye li ser banên trênen Hindistanê.

Nîv saet şûnda tişta jê ditirsîyam hat. Tansîyona min bilind bû, her çû derket jor. Xwîn ji pêçî heta serî dikele. Bîhn li min diçike. Min bangê hostesê kir. Rewşa xwe jê ra got û jê aleta tansîyonpîverê û qeşayê xwest. Wê li rûyê min nihêrî, nexweşîya min fêhm kir û çû xwestekên min hema anîn. Min tansîyonê pîva, 185 lêdixê. Bi alîkarîya hostesê min qeşayê xist nav destmalekê danî ser enîya xwe, cenîkên xwe, ku zutirîn dem sar bin û tansîyon bikeve.

Şerê min ê bi tansîyonê ra di hemû rêya Delhîyê da berdawam kir. Her wisa li Hindistanê jî. Min careke din tansîyonê pîva vêca 198 lê dixê. Ji xeta sor jî derbas kirîye. Zor dide mejî, dil û çavan. Çavên min şîlo dibin. Gelo mirin çawa ye li hewayê? Her hal mirina herî sivik û xweş li ser ewran e. Zûbizû bi dest nakeve.



Guruba me ya sefera Hindistanê. Ji alîyê çepê Hans û çenteya wî ya kamera û maşîneya fotoyê. Fransîşk û hevala wê Anna, Klaus û xanima wî. Mêrê Cristinayê û Cristina, Miriam, ez û Giselaya mîna min malnîşîn.

Îcar du hostes bi hev ra hatin. Ser, dest û milên min bi qeşayê miz dan. Digel ewqas êş jî moralê min li cî bû. Heke meriv delalîyekê bi mirinê bide, ew jî ken e. Rewşa min wêrekîyê dida hostesan jî. Yek ji wan got, „li qata jorê doktorekî

heye. Em dê te bibin ba wî. Ji bussînesê li Delhîyê tu dê zûtir peya bî û herî revîra balafirxaneyê."

Wan bi saxî ez nehîştim derêmin qata jor. Ew dê îcar herhal mirîyên min ji wir derxin. „Bi vê tansîyonê hun dê min çawa derxin? Heke hinek daket paşê." Dibêjim wan. Min hebeke din a tansîyonê daqurtand. Lîmonê ku min ji wan xwestibû givaşt avê vexwar, rêwîyê kêleka min bi destê xwe qeşaya serê min girtîye. Nivsaet şûnda min hîs kir, ku mîratê tansîyonê dadikeve. Careke din pîvam 168 e. Bi vê dikarim derêmin jor. Hostesan çente û dermanên min girtin, ketin bin milên min ez anîm qata jor. Wan ez li ser palkursîyeke mîna nivîn dirêj kirim. Doktorî zenda min girt lêdana xwînê kontrol kir. Wî dermanên min, çîroka nexweşîyê pirs kirin. Min jêra vegot. Ji xeynê raporkirina mirina min, bi xwe tiştêkî ku bikira tinebû. Qeşayên helîyayî nû dikim li ser û destên xwe. Doktorî vî şerê min ê bi tansîyonê ra dît, kenîya û got, tu dê qezenc bikî! Nivsaet maye ku teyrehut li balafirxaneya Delhîyê dayîne. Ji ber nexweşîyê mixabin nikarim pêvajoyê bişopînim. Bi lêdana çepikên rêwîyan ra, me li balafirxaneyê danî.

Delhîya Nû

Hostesan berê hemûyan ez ji zikê hutê derxistim. Çawa derî vebû ketim hundurê balafirxaneyê hewayeke germ a giran li rûyê min da. Mîna mahşer qerebalix bû. Du memûrên tendurustîyê bi tevê lek û pekên min, ez hildam birim revîra balafirxaneyê. Li wir qederê sê çarêk dirêj kirî mam. Careke din pîvan, kambax îcar bibû 152. Tomografîya dil kişandin. Doktorî kontrol kir û got; „hêdî hêdî tu dikarî herî." Min jî hîs kir, ku dikarim bimeşim. Dema ji derîyê kontrolê derketim. Çi bibînim? Bi sedan fîrmayên turîstîk, bi hezeran kes li ber şaltêran li benda rêwîyên xwe ne.



Saet 03yê beyanîyê.
Li ber balafirgeha
Delhîyê ya bi navê
Îndra Gandîyê. Dema
derketim derva çî
bibînim? Bi deh
hezaran meriv mîna
di xwepêşandane da
bin, bi cûrbecûr
zimanan, dipeyivîn,
diqêrtîyan. Hemû bi
awayekê heyecanê li
benda mêvanên xwe
bûn. Beyanî di binê
hewayê qirêj û giran
da dîl mabû.

Hêdî hêdî ber bi wan da çûm, ku şîlta fîrmaya Pfönixsê bibînim. Hundir bi dûman e, yan çavê min? Tê dernaxim. Kêlîyeke şûnda min di destê xortekî simbêlmûç ê devbiken da şîlta Pfönixê dît û ber pêda çûm. Ev xortê bi navê

Paragam rêberê me bû û ew dê hemû seferê bi me ra be. Paragam bêtir bi keneke ji dil ez pêşwazî kirim. Min neweşîya xwe jê ra got.

Wî jî got: "Meraq meke tiştekî acîl çêbe, ez ê hema bangê doktorî bikim." Paşê cîyê chanceyê (pereveguhastinê) nîşanê min da, daku ez rûpîyê hindî bikirim.

Piştê pereveguhastinê careke din hatim ba rêber Paragamî. Ew li benda rêwîyên din bû, ku ji bilî min deh kes bûn. Min nihêrî bendemayîn dê dereng bajo, min jê ra got, "ez ê derkevim derva, hewayeke paqij hilînim, heta hun hatin."

Bi derketinê ra poşman bûm. Hewaya derva ji nav balafirgehê hîn qirêjtir bû, digel ku beyanîya sibeyê bû jî. Ji ber sedemên ewlehîyê, dema meriv ji balafirxaneyê derketa nema dikaribû paşva vegeşîya. Bihezaran kes li ber derîyê beşa-A ku em jê derketin, li benda rêwîyên xwe bûn. Her yek bi zimanekî, qareqar û wîlewîla wan bû. Hema ji vê dîmenê meriv tê derdixist ku Hindistan buhuşta bi sedan zimanan e. Ji ber qirêjîya hewayê gelek kes devên xwe pêçandibûn. Paşê jî ez rast li gelek devên pêçayî hatim di vê seferê da.



Rêberê me Paragam, almanî li înstîtûya Goteyê ya Delhîyê hîn bûye. Nû zewicîye û merivekî zana û baqil e.



Li navenda Delhîya Nû monumenta Raj Path. Îngilîzan bi hezaran Hîndî birine di şerên berjewendîyê xwe da dane kuştin, paşê jî ji bi wan vê monumentê çêkirine...

Piştê saetekê Paragam li pêşî, neh hevalên guruba me li dû, ku ji curbicur bajarên Almanyayê hatibûn, ji balafirxaneyê derketin. Me tev, da dû xortê rêber û berê xwe da otobosa ku em ê pê biçin otêlê. Hotêl Ibis ku em ê du roj lê bimînin nêzîkê balafirxaneyê bû. Bîst deqe şunda em hatin ber derîyê Otêlê. Xizmetkarên otêlê bi silavên hindî "namaste" em pêşwazî kirin. Bi heman awayê me jî silavê li wan vegevandin. Bawolên me hildan û em birin odeyên me. Min bexşîşa xortê xizmetkar dayê, derî girt û çûm dûşê. Piştê dûşê hinek rehet bûm. Pêncê beyanîyê bû li Delhîyê. Min perdeya pencereyê da alî, dûmanekî qirêj ê gewreşîn mîna ewran bi ser bajêr da girtibû. Bîhn lê çikandibû.

Saet di heştan da ji xewê rabûm. Ji bo taştêyê daketim restorantê. Saet di nehan da jî Paragam dê me ji ber derê otêlê hilde û em ê biçin gera nav bajêr. Me hevalên gurubê li taştêyê hev nas kirin. Piranîya wan mîna min malnîşîn bûn. Klaus û xanima wî ji gundekî nêzîkê Munîhê hatibûn. Giselayê ku li nivê cîhanê gerîyaye û mîna min hemû pereyên xwe li wan geran xerc kirine, ji Frankfurtê hatibû. Hansê ku ji bajarokekî nêzîkê Kolnê hatibû, amator fotokêş bû û hemû barê wî maşîneyên fotoyê, kamera û objektîfên qirase bûn.

Cristinaya xwedîyê sê nevîyan û mêrê wê ji Dortmundê hatibûn. Miriama ku hingî xaribû bûbû 170 kîlo û bi dirheman dipeyîvî û Fransîzka û hevalê wê Anna ji alîyê Bremenê hatibûn. Ji jinan çar bêmêr bûn. Mêrê Crîstînayê yê henekhez dibû belayê serê min û carê carekê digot: "Yekê ji wan ji xwe ra bistîne!"

Paragam saet tam di nehan da bi otoboseke biçûk hat ber derîyê otêlê. Me tîlefona, kamera û şûşeyên avê hildan û em siwarê otobosê bûn. Di hemû seferê da tişta divîya hertim bi me ra ba, şûşeyên avê bûn. Di wê germayîya Hindistanê da rojê herî kêr pêdivî bi çar lîtro avê hebû. Tawilê hej bi otobosa me ket û rabû. Hinek kevin bibû, lê hem klîma tê da hebû, hem jî vantîlatorên bawêşînê. Dema klîma têr nekira, me vantîlatoran vedikir, ji bo nefeshildanê. Şofêr û muawênê wî du xortên sîxî bûn. Pir mêwanperwer û hurmetkar bûn. Ew û otobosa wan di hemû dema seferê da xizmeteke baş kirin. Herçiqas otobos di rêyên kortik da mêtroyekê qîloz dibû, dil û hinavên me mîkser dikir jî..

Ji bo ku meriv bajarekî nas bike divê meriv pêşî here yekemîn cîyê ku lê ava bûye. Cîyê wî yê kevn. Me jî wisa kir û ji Delhîya kevin dest bi gera xwe kir. Avahîyên sade yên bi mîmarîya hîndî, bi tevê gelek mabedên hîndî, budîst û çend mizgeftên musulmanan li Delhîya Kevin in. Çarşî û bazara herî kevin a Delhîyê jî li vir e. Bila çarşîyeke bi rêkûpêk neyê bîra we. Dikanên biçûk malên tê da, ku piranîya wan qumaşên rengareng in, hevrişim û baharat in. Bi hezaran mirov, tuktuk (teqşîyên, sê teker), motosiqlet, bisiqlet, otomobîl, dibê qey hemû avêtêne ser hev. Erdhejek lê qewimîye.



Rêyên navbajêr û derûdorên wî hemû di vê kaosê da ne. Wesatî santîm bi santîm pêş va diçin. Ev rêya ku diçe Delhîya kevn jî her wisa. Lê heke meriv saxlem bimîne, heta armancê.



Mabedên hîndî mabedên azad û rihet in. Meriv dikare foto bikişîne. Tê da bipeyîve, bigere. Diktatorî û mecbûrîyet tineye ji bo duaşîrînê. Bawer biki, nekî dikarî herî hundur. Lê divê meriv solên xwe derxe. Êh ewqas jî normal e..

Paragamî gurubê hilda çû mizgefta ku li jora bazarê ava kirine. Ew li ser girekî ye, bi pêlikan meriv dikare biçê. Ji bo tendurustîya min bêhtir xirab nebe ez neçûmê. Navê vê mizgeftê bi farisî „Masjîd-i Jahan Numa" ye. Di dema dagirkerîya îslamê da di navbera salên 1650 û 1656 an da hatîye avakirin. Du minare û sê kumbetên wê hene û hewşîya wê ya nod mêtro dirêj 20 000 kes hiltîne ji bo seromonîyên hîpnozkirina girseyî. Ereb, faris û tirkên mîna cîyên din bi mezgeft û hîpnozê ra îslamê anîne Hindistanê jî. Belkî qisimekê Kurd jî ji wan ra leşkerî kirîye. Eynî rewşa îroyîn. Ji ber meznayî û xurtbûna ol û efsûnên din ên vî welatî, nekarîne hemû Hindistanê daqurtînin.

Lê dîsa jî, di wan salan da parçeyên mezin jê dagirkirine. Mîna Pakistan, Bengaldeşa îroyîn û Racaistana eyaleta Hindistanê.

Heta gurub vegerîya ez li jêrê mam. Bi çend peyivên xwe yên îngilîzî min hewl da bi xelkê ra kontakê dayînim. Ji ber malbata me ya ziman a hindî-ewropî, carinan jî min pere bi kurdî dijimartin „du-sê, deh-bîst.” Gelek kêfa wan dihat û bêhtir nêzîkê min dibûn. Lê ji deng û qerebalixê meriv nikaribû hev fêhm bikira. Çarşî û kolanên wê wisa tije bûn, ku meriv genim bireşanda li erdê nediket. Ewqas tevlihev bûn. Kolan li kuderê diqedin li kuderê dest pê dikin, mirov tê dernedixist. Û bi hezaran tîlên elektirîkê li ser dikan û xaniyên çarşîyê daliqandî bûn. Heta ewqas daliqîbûn jêrê, ku metirsî ye, serê meriv li keve. Çend kes, çend ajalên reben li wan tîlên elektirîkê ketine û mirine? Ew jî nayê zanîn.



Dema girêdana egalê sixî. Mîna ku meriv bibe zava. Şofêrê otobosê û mûawênê wî egalê di nava 10 deqeyan da li serê min pêçan. Zehmet e, ku biyanîyekî bikare wî egalê di 2-3 saetan da girê bide. Egalê ji hevrişimê çêkiri, hiç giranîyê nade mirov, pir sivik û rihet e. Pir baş mirov ji tirêjên rojê diparêze. Kumeke ji datînin binê wî, Ji bo ku neşimite. Zehmetiya wî dema ku serê meriv dixure ye, Çimkî meriv nikare wî zirtûpirt ji serê xwe dayîne. Ew dema vebû pêwîst e carekê din were girêdan. Ji ber vê yekê jî divê meriv darikeke di ber egalê ra bike, hingî serê xwe bixurîne.

Piştê nîv saetan Paragamî grubê anî jêrê, cîyê ku ez li benda wan bûm. Li vir me pênc tuktuk kirê kirin, daku pê li çarşîyê bigerin. Tuktuk teksîyên orjînal ên Hindistanê ne. Ev tuktukine berê du çerxe bûn. Du-sê kes lê siwar dibûn. Ajovan li şûna hespê diket pêşîya tuktukê û ew dikişand. Niha bûne sê çerxe. Yan bi bisiqlêtên sêçerxe ne, yan jî bi motorsiqlêtên sêçerxe. Ajovan lê siwar dibe, dajo. Jiber Hindî jar in, dikarin heta 7-8 kes li van teksîyan siwar bin. Lê Ewropayî ji ber ku qelew in, tenê 2 kes dikarin tê da bi cî bin. Carinan têra keseke/î qunmezin jî nake.

Ez û Hans di tuktukekî da encax bi cî bûn. 5 tuktukên me dan dû hev û em ketin deryayaya meriv, tuktuk, bisiqlêt, motosiqletan. Hemû mîna ku li ser piştê hev bimeşin, kolan ewqas ku teng bûn. Kî mir, çû ji kîsê heft bavê xwe!